

Bosna i Hercegovina
Federacija Bosne i Hercegovine
KANTON SARAJEVO
MINISTARSTVO UNUTRAŠNJIH POSLOVA
UPRAVA POLICIJE
SARAJEVO

18 -10- 2017

P R A V I L N I K

o izgledu, obilježavanju, registraciji i korištenju vozila
Uprave policije Ministarstva unutrašnjih poslova Kantona Sarajevo

Sarajevo, oktobar 2017. godine

Na osnovu člana 23. stav (3) tačka d). i tačka h) Zakona o unutrašnjim poslovima Kantona Sarajevo („Službene novine Kantona Sarajevo“ broj 1/16), policijski komesar Uprave policije Ministarstva unutrašnjih poslova Kantona Sarajevo, donosi:

P R A V I L N I K

**o izgledu, obilježavanju, registraciji i korištenju vozila
Uprave policije Ministarstva unutrašnjih poslova Kantona Sarajevo**

I OSNOVNE ODREDBE

Član 1.

(Predmet Pravilnika)

Ovim pravilnikom utvrđuje se izgled, obilježavanje, registracija i korištenje vozila Uprave policije Ministarstva unutrašnjih poslova Kantona Sarajevo (u daljem tekstu: Uprava policije).

Član 2.

(Definicija vozila)

- (1) Vozilom u smislu ovog pravilnika, smatraju se motorna vozila, koja se koriste za obavljanje poslova iz člana 20. Zakona o unutrašnjim poslovima Kantona Sarajevo, koji se organizuju u okviru Uprave policije, kao i svako vozilo čiji je vlasnik Uprava policije i vozilo koje se nalazi na korištenju u organizacionim jedinicama Uprave policije na osnovu vlasništva, posebnog ugovora, zakupa, lizinga, posebne odluke ili po drugom obavezno-pravnom osnovu (u daljem tekstu: vozilo).
- (2) Izuzetno od odredbe člana 2. stav (1), službenim vozilima smatraju se i bicikli koji se koriste za obavljanje službenih poslova i zadataka, kao i službene motorne sanke kada se koriste u skladu sa odredbama Zakona o javnim skijalištima („Službene novine Kantona Sarajevo“, broj 54/12).

Član 3.

(Vrste vozila)

Motorna i priključna vozila Uprave policije prema ovom pravilniku su:

1. vozila s policijskim obilježjima
2. vozila s djelimičnim policijskim obilježjima
3. vozila bez policijskih obilježja.

Član 4.

(Način korištenja motornih vozila)

Policijski komesar Uprave policije (u daljem tekstu: policijski komesar) dužan je osigurati da se vozila koja su utvrđena ovim Pravilnikom koriste na pravilan i zakonit način, a radi izvršenja poslova iz člana 20. Zakona o unutrašnjim poslovima Kantona Sarajevo i u drugim slučajevima predviđenim ovim pravilnikom i odgovoran je za njihovo korištenje.

Član 5.

(Ovlaštena lica za korištenje motornih vozila)

Vozilom iz člana 2. ovog Pravilnika, upravljaju i održavaju policijski službenici, državni službenici i namještenici koji su postavljeni i raspoređeni na radnim mjestima na kojima se izvršavaju poslovi iz člana 20. Zakona o unutrašnjim poslovima Kantona Sarajevo.

II IZGLED I OBILJEŽAVANJE VOZILA UPRAVE POLICIJE

Član 6.

(Izgled i obilježavanje vozila)

(1) Vozila sa policijskim obilježjima u skladu sa ovim pravilnikom imaju sljedeći izgled i obilježja:

1. Vozila iz člana 2. ovog pravilnika obojena su bijelom osnovnom bojom. Bočne strane vozila kao i dijelovi prednjeg i zadnjeg dijela vozila se obilježuju nereflektujućom folijom sivo/crne boje koja je oivičena crvenom isprekidanom reflektujućom trakom.
2. Na središnjem dijelu poklopca motora postavljen je simbol/znak Uprave policije zlatno žute boje, u vidu samoljepljive reflektujuće folije, koji je proporcionalan veličini poklopca motora u zavisnosti od marke i tipa vozila.
3. Na poklopcu motora ispod znaka policije, nalazi se natpis „POLICIJA“, a koji je suprotan boji podloge, ispisan u pismu „Swiss com pressed-bold“. Slovno obilježavanje POLICIJA se nalazi takođe na bočnim stranama vozila i na zadnjem dijelu vozila
4. Na zadnjoj i bočnim stranama vozila ispisan je broj pozivnog centra „122“ u odgovarajućoj veličini, korištenjem reflektujuće folije.
5. Znak policije se nalazi na bočnim i na zadnjoj strani vozila u manjim dimenzijama u odnosu na znak na poklopcu motora.

Reflektujuća folija treba da pruža vidljiva obilježja vozila u prilikama smanjene vidljivosti, te mora biti postojana i izdržljiva na vremenske uticaje, kao i pranje i stalno korištenje vozila.

Sve postavljene folije se presvlače zaštitnom bezbojnom folijom, koja će pružiti postojanost i duži vijek obilježja na vozilima.

Garancija za postavljene folije kojima se obilježavaju vozila policije mora biti minimalno 4 godine.

(2) Vozila sa djelimičnim policijskim obilježjima u skladu sa ovim Pravilnikom imaju sljedeći izgled i obilježja:

1. Na središnjem dijelu poklopca motora imaju simetrično postavljen simbol/znak Uprave policije zlatno žute boje, u vidu samoljepljive reflektujuće folije, koji je proporcionalan veličini poklopca motora u zavisnosti od marke i tipa vozila.
2. Slovno obilježavanje „POLICIJA“ se nalazi na bočnim stranama vozila i na zadnjem dijelu vozila
3. Na poklopcu motora ispod znaka policije, na središnjem dijelu bočnih i zadnje strane vozila, se nalazi natpis „POLICIJA“, ispisan fontom slova „Swiss com pressed-bold“, koji je suprotan boji podloge
4. Na zadnjoj i bočnim stranama vozila u odgovarajućoj veličini reflektujućim trakama ispisan je broj pozivnog centra „122“.

(3) Vozila bez policijskih obilježja u skladu sa ovim Pravilnikom mogu imati ugrađene uređaje za registrovanje prekršaja vozila u saobraćaju, a vozila koja se koriste u

- otkrivanja krivičnih djela, zaštiti određenih ličnosti, mogu imati ugrađenu i policijsku svjetlosnu i zvučnu signalizaciju i sistem radio veze.
- (4) Vozila iz stava 3. ovoga člana sa ugrađenim uređajima za registrovanje prekršaja vozila u pokretu mogu imati i uređaj za ispisivanje naredbi vozačima, smješten na zadnjoj polici ispod stražnjeg vjetrobranskog stakla.
 - (5) Vozilima bez policijskih obilježja smatara se sva druga vozila koja koristi Uprava policije, a ne posjeduju bilo kakva obilježja ili uređaje.

Član 7.

(Izgled i obilježavanje motocikala, bicikala i motornih sanki)

- (1) Motocikli, bicikli i motorne sanke, koji se koriste u službene svrhe u Upravi policije obilježavaju se na način da se obilježavaju propisanim znakom/grbom policije, u veličini koja je u srazmjeru sa ovom vrstom vozila, koristeći proporcionalno umanjene parametre propisane za vozila.
- (2) Obilježavanje motocikala i bicikala se vrši reflektujućim folijama, koje se lijepe na motocikle/bicikle i to na način da se vodi računa da linije postavljenih folija prate izvedbene linije vozila.
- (3) Motocikli, mopedi i motorne sanke sa policijskim obilježjima imaju svjetlosnu i zvučnu signalizaciju, koja je ugrađena na prednjoj strani vozila i dva manja plava svjetla ugrađena na stražnjem dijelu vozila iznad registarske tablice, policijsku oznaku minimalne visine 10 cm na prednjem dijelu motocikla ili mopeda, sa obje strane rezervoara za gorivo ili sa obje strane prednjeg dijela štitnika, te mogu biti opremljeni plavom teleskop lampom.

Reflektujuća folija čini vidljivim obilježja vozila u prilikama smanjene vidljivosti, te mora biti postojana i izdržljiva na vremenske uticaje, kao i pranje i stalno korištenje vozila. Sve postavljene folije se presvlače i zaštitnom bezbojnom folijom koja pruža postojanost i duži vijek obilježja na vozilima. Garancija za postavljene folije, kojima se obilježavaju vozila, mora biti minimalno 4 godine.

Član 8.

(Oprema u vozilima)

- (1) Vozila sa policijskim obilježjima, moraju imati:
 - 1) ugrađen uređaj za davanje zvučnih znakova i signalizacije (elektronsko pojačalo) u nizu tonova različitih visina s mikrofonskom kombinacijom. Uređaj mora da ima mogućnost govora preko mikrofona, kao i regulaciju jačine zvuka.
 - 2) policijsku svjetlosnu signalizaciju ugrađenu na najvišem dijelu vozila i to:
 - a) Svjetlosni blok je sastavljen od modula sa LED diodama (linearne diode) koje daju crvenu/plavu ili plavo/plavo svijetlost
 - b) Tijelo svjetlosnog bloka mora biti izrađeno od čvrstog materijala koji može da zadovolji stalnu upotrebu kao i stalne vremenske uticaje.
 - c) Svi moduli unutar svjetlosnog bloka moraju biti pristupačni i izmjenjivi. Obavezna je vodootpornost svjetlosnog bloka koja će se ogledati sa gumenim zaštitama na spojevima.
 - d) Na središnjem dijelu čeonu strane potrebno je da svijetlosni blok ima ugrađen svjetlosne led diode koje se zovu Alley modul (ulični modul), koji dozvoljava policijskom službeniku osvjetljavanje mračnih ulica sa bočnih strana vozila.
 - e) Svjetlosni blok je putem kabla povezan sa upravljačkom konzolom unutar vozila, kojim se vrši upravljanje svjetlosnom signalizacijom. U svjetlosnom bloku je integrisan i zvučnik za sirenu. Isti se postavlja na nosačima koji se vezuju sa vozilom na način da se karoserija vozila na bilo koji način ne

- oštećuje (bušenje rupa na vozilu ili mehaničke veze koje oštećuju lak i dr.), nosači moraju biti otporni na vlagu koroziju i vanjske uticaje.
- f) Veza može biti magnetima ili nosačima, koji koriste fabričke utore na vozilu a da pritom ne oštećuju vozilo na gore propisane načine.
 - g) Dva izvora svjetlosti, koji mogu biti crvene boje (na lijevoj strani vozila) i plave boje (na desnoj strani vozila) ili
 - h) Dva izvora svjetlosti plave boje ili u kombinaciji crvene i plave boje integrisana u krovnu konzolu na kojoj se s prednje i stražnje strane nalazi natpis »POLICIJA«, koja može biti opremljena i uređajem s mogućnošću ispisa naredbi vozačima.
- (2) Vozila sa policijskim obilježjima, kao i vozila sa djelimičnim policijskim obilježjima mogu imati i LED blinkere/trepače koji se ugrađuju na prednjem dijelu vozila i to u unutrašnjosti maske/rešetke i to dva modula sa 6 dioda na integrisanim nosačima. Blinkeri su u plavoj i crvenoj boji kojima se može upravljati sa centralne konzole smještene u unutrašnjosti vozila. Napon blinkera je 12V. Blinkeri zbog mjesta na kojem se nalaze moraju biti u veoma otpornom kućištu koji je otporan na vanjske uticaje, koroziju, vlagu i dr.
- (3) U vozilima sa policijskim obilježjima i vozilima sa djelimičnim policijskim obilježjima po pravilu ugrađuju se mobilni-kolski sistemi radio veza, a može biti ugrađena i druga oprema i uređaji koji su neophodni za efikasno izvršavanje poslova i zadataka.
- (4) Za policijska vozila koja se koriste, a nemaju obilježja policije se predviđa da moraju imati ugrađene blinkere/trepače u masci/rešetka na prednjem dijelu vozila, dok u dijelu ispod poklopca motora (koji dozvoljava nesmetano funkcionisanje vozila) se montira zvučnik/spikerfon koji je povezan sa kontrolnom kutijom u vozilu, za zvučnu signalizaciju. Takav tip vozila može dodatno imati na mjestu kontrolne table prednje šajbe ili zadnje šajbe mobilne linearne LED treptače crveno plave boje, koji se koriste po potrebi, a vezuju se putem silikonskih/gumenih učvršćivača.
- Garantni rok za svjetlosno zvučnu opremu i uređaje koji su prateća oprema je minimalno 5 godina.

III REGISTRACIJA I KORIŠTENJE VOZILA

Član 9.

(Registracija vozila)

- (1) Registracija motornih vozila iz člana 2. ovog Pravilnika vrši se prema propisima o registraciji vozila u vlasništvu fizičkih i pravnih lica, koji se primjenjuju u Kantonu Sarajevo, prema adresi sjedišta Uprave policije.
- (2) Registraciju vozila u vlasništvu Uprave policije vrši Sektor za materijalno-finansijske poslove.

Član 10.

(Upravljanje vozilom)

- (1) Vozilom Uprave policije može upravljati zaposlenik Uprave policije sa položenim vozačkim ispitom odgovarajuće kategorije koja je potrebna za tu vrstu vozila.
- (2) Vozilom Uprave policije koje je obilježeno policijskim obilježjima, po pravilu mogu upravljati policijski službenici u uniformi, osim u slučajevima kada to odobri policijski komesar ili drugi rukovodeći policijski službenik kojeg on ovlasti ili kada je to potrebno iz razloga hitnosti ili više sile.

- (3) Zaposlenik koji upravlja vozilom Uprave policije odgovoran je za pravilnu upotrebu vozila, mora se starati o potrebnoj opremi i čistoći vozila, a osobito za pridržavanje propisa u drumskom saobraćaju.
- (4) U vozilima Uprave policije nije dozvoljeno konzumiranje hrane, pića i pušenje.
- (5) Prije preuzimanja vozila, zaposlenik je dužan da provjeri da li je vozilo registrovano, posjeduje li odgovarajuću opremu i da li ima vidljivih oštećenja i nedostataka.
- (6) Saobraćajna dozvola i ključevi od vozila ne drže se u vozilu dok je parkirano i isti moraju biti na odgovarajući način deponovani i osigurani od neovlaštene upotrebe.

Član 11.

(Postupanje sa vozilom)

- (1) Zaposlenik koji upravlja vozilom iz člana 2. ovog Pravilnika dužan je da tim vozilom pažljivo rukuje i da nakon izvršenog službenog zadatka vrati to vozilo u garažu ili na parking mjesto koje je utvrđeno za to vozilo.
- (2) Prilikom korištenja vozila na službenom putu, zaposlenik Uprave policije dužan je vozilo parkirati na prostoru koji je na određeni način osiguran sa mjerama fizičke ili tehničke zaštite.
- (3) Nakon završetka korištenja vozila zaposlenik je dužan, neposredno nadređenom rukovodiocu, prijaviti svaku vrstu štete, nedostatke i neispravnosti na vozilu i sačiniti službeni izvještaj.

Član 12.

(Korištenje vozila)

- (1) Vozila iz člana 2. ovog Pravilnika, isključivo se koriste za obavljanje službenih poslova i zadataka, u slučajevima kada nadležni rukovodilac ocijeni da je za obavljanje službene radnje ili izvršenje zadatka neophodno korištenje vozila.
- (2) Vozilo se može koristiti i u sljedećim slučajevima, a uz prethodnu saglasnost ili odobrenje policijskog komesara:
 - a) protokolarne usluge, odnosno prijevoz delegacija i gostiju Uprave policije, u skladu sa programom njihovog boravka,
 - b) prijevoz u slučaju teške bolesti zaposlenika, kao i prijevoz članova uže porodice u slučaju smrti zaposlenika Uprave policije,
 - c) prijevoz sindikalnih aktivista u skladu sa odredbama Kolektivnog ugovora za zaposlenike Ministarstva unutrašnjih poslova Kantona Sarajevo.
- (3) Vozila se ne mogu koristiti za prijevoz na posao i sa posla zaposlenika Uprave policije, kao i za obavljanje privatnih poslova.
- (4) Policijski komesar, s obzirom na prirodu posla koji obavlja, može koristiti vozilo tokom svih 24 sata u toku dana, a u skladu s tim može angažovati i vozača.

Član 13.

(Raspored i zaduženje vozila)

- (1) Policijski komesar će posebnim aktom izvršiti raspored i zaduženja vozila po organizacionim jedinicama Uprave policije.
- (2) Na osnovu akta iz stava (1) ovog člana odredit će i odgovornog rukovodioca organizacione jedinice koji će biti zadužen za provođenje odredbi ovog Pravilnika.

Član 14.

(Izdavanje putnog naloga, vođenje tehničke knjige vozila)

- (1) Za korištenje vozila Uprave policije mjesečno se izdaje putni nalog na odgovarajućem unificiranom obrascu.
- (2) Putne naloge za korištenje vozila, rukovodiocima osnovnih organizacionih jedinica potpisuje policijski komesar ili lice koje on ovlasti, a putne naloge za korištenje vozila u okviru osnovnih organizacionih jedinica Uprave policije potpisuje rukovodilac osnovne organizacione jedinice.
- (3) Putni nalog za vozilo kojim se vrši službeno putovanje van Kantona Sarajevo ili u inostranstvo izdaje policijski komesar ili lice koje on ovlasti.
- (4) Zaposlenik Uprave policije koji upravlja vozilom dužan je evidentirati svako korištenje vozila u putni nalog i tehničku knjigu vozila.
- (5) Putni nalozi i tehničke knjige vozila čuvaju se pet (5) godina od dana zaključivanja istih.

Član 15.

(Održavanje vozila)

- (1) Rukovodilac autoservisa odgovoran je za tehničku ispravnost vozila Uprave policije, koji se odnose na redovno održavanje voznog parka (pranje, čišćenje vozila, podmazivanje, promjena ulja i maziva, rashladnih tečnosti i sl.) i njihovu upotrebu.
- (2) Rukovodilac autoservisa dužan je da prati tehničke normative za servisiranje vozila, auto-gume, sklopove i druge dijelove koji su navedeni u listi proizvođača.
- (3) Rukovodilac autoservisa odgovoran je za ažurno vođenje evidencija o utrošku pogonskog goriva, maziva i ostalih sredstava potrebnih za održavanje vozila, praćenje naplate štete od osiguravajućih društava za vozila, predlaže izdavanje naloga za opravku vozila i nabavku rezervnih dijelova.

Član 16.

(Nadzor)

- (1) Nadzor nad provođenjem odredbi ovog pravilnika vršit će policijski komesar, Odjeljenje za unutrašnji nadzor, koordinaciju i usmjeravanje, kao i rukovodioci organizacionih jedinica u kojima su raspoređena vozila, svako iz svoje nadležnosti.
- (2) Korištenje vozila suprotno odredbama ovog Pravilnika podliježe disciplinskoj odgovornosti.

IV PRIJELAZNE I ZAVRŠNE ODREDBE

Član 17.

(Izgled vozila za kojim je prestala potreba za njegovim korištenjem)

Kada prestane potreba za korištenjem vozila iz člana 2. ovog pravilnika (prodaja vozila ili uništenje), sa vozila se uklanjaju svi elementi kako obilježja tako i gore navedena oprema u vozilu i na vozilu, uklonjeni svi natpisi i obilježja, te demontirana sredstva veze i uređaji za davanje posebnih zvučnih i svjetlosnih signala, koji su postavljeni u skladu sa ovim Pravilnikom

Član 18.
(Prestanak važenja)

Donošenjem ovog Pravilnika stavlja se van snage Pravilnik o izgledu, obilježavanju, registraciji i upotrebi vozila Ministarstva unutrašnjih poslova Kantona Sarajevo broj 01-651/04 od 23.11.2004. godine i Dopuna Pravilnika o izgledu, obilježavanju, registraciji i upotrebi vozila Ministarstva unutrašnjih poslova Kantona Sarajevo broj 01-652-2/04 od 31.12.2004 godinu u dijelu koji se odnosi na vozila, uposlenike i nadležnosti Uprave policije Ministarstva unutrašnjih poslova Kantona Sarajevo.

Član 19.
(Stupanje na snagu)

Ovaj Pravilnik stupa na snagu danom donošenja.

Broj: 02-370
Datum: 17-10-2017

